

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 230460 23 St
Zenica, 27.06.2024. godine

Općinski sud u Zenici, stečajni sudija Samra Spahić-Drino, u stečajnom postupku nad stečajnim dužnikom „LUNGO MARE“ Društvo za prevoz, turističko agencijske usluge, marketing i trgovinu d.o.o. Kakanj, sa sjedištem na adresi ZPO-a bb, Kakanj, matični registarski broj subjekta upisa 43-01-0621-12, kojeg zastupa punomoćnik Hadžić Admir, advokat iz Kaknja, nakon održanog ročišta 12.02.2024. godine, kome su prisustvovali privremeni stečajni upravnik Pašalić Muamer i punomoćnik predlagača Alagić Faris, advokatski pripravnik kod advokata Admira Hadžića, van ročišta, dana 27.06.2024. godine donio je:

R J E Š E N J E

Otvara se i zaključuje stečajni postupak nad stečajnim dužnikom „LUNGO MARE“ Društvo za prevoz, turističko agencijske usluge, marketing i trgovinu d.o.o. Kakanj, ulica ZPO-a bb, Kakanj, matični registarski broj subjekta upisa 43-01-0621-12, zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 43-01-0621-12, po pravomoćnosti ovoga rješenja.

O b r a z l o ž e n j e

Prijedlogom od 29.05.2024. godine predlagač „LUNGO MARE“ Društvo za prevoz, turističko agencijske usluge, marketing i trgovinu d.o.o. Kakanj, ulica ZPO-a bb, Kakanj, podnio je ovom sudu prijedlog za otvaranje stečajnog postupka nad navedenim društvom zbog platežne nesposobnosti duže od 24 mjeseca kao posljedica narušenog zdravstvenog stanja odgovornog lica.

Rješenjem ovog suda od 16.11.2023. godine pokrenut je prethodni postupak za utvrđivanje uvjeta za otvaranje stečajnog postupka nad navedenim društvom, te je radi utvrđivanja uvjeta za otvaranje stečajnog postupka za privremenog stečajnog upravnika imenovan Pašalić Muamer iz Zenice, koji je na listi stečajnih upravnika

Iz izvještaja privremenog stečajnog upravnika, koji je dostavljen sudu 8.1.2024. godine proizilazi da prema zaključku i mišljenju privremenog stečajnog upravnika društvo nema evidentirana stalna sredstva, zalihe, novac u blagajni, niti bilo kakvu drugu imovinu, da obaveze iznose 96.807,00 KM, da ima otvoren račun u UniCredit banci blokiran od 15.7.2021. godine, da ne obavlja svoju registrovanu djelatnost duže od 3 godine niti ima mogućnost sa poslovanje nastavi, da je prijedlog za otvaranje stečajnog postupka pokrenut od strane zakonskog zastupnika Ljubojević Dragan, da imovina ne postoji i nije dovoljna za pokriće troškova stečajnog postupka te su ispunjeni uslovi da stečajni sud otvori stečajni postupka koji se neće provoditi u skladu sa članom 102. stav 7. Zakona o stečaju i da prijedlog nije podnesen u zakonskom roku, a dugovanja i potraživanja su dospjela. Društvo nema imovine koju bi obezbjeđivao i o kojoj bi se starao privremeni stečajni upravnik, društvo ostvaruje negativan finansijski rezultat, gubici u poslovanju se kumuliraju kao obaveze, a razlog za otvaranje stečajnog postupka je platežna nesposobnost, pošto je račun blokiran već 2 godine. Naveo je daje prijedlog podnesen 26.5.2023. godine i nije podnesen u zakonskom roku predviđenom članom 63. stav 7. alineja b. Mišljenja je da se troškovi stečajnog postupka ne mogu namiriti iz imovine koja bi spadala u stečajnu masu, jer ista ne postoji, i da se može otvoriti stečajni postupak, jer je dopušten i postoji stečajni razlog za otvaranje.

Privremeni stečajni upravnik je na ročištu održanom 12.2.2024. godine izjavio da ostaje kod izvještaja od 8.1.2024. godine, da društvo ne posjeduje imovinu koja bi bila pogodna za otvaranje i vođenje stečajnog postupka, da društvo nije evidentirano kao vlasnik u zemljišnoj knjizi, nije evidentirano kao

nosilac prava u katastarskom operatu, da ne posjeduje pokretnu imovinu, a nakon što je stupio u kontakt sa direktorom izašao je na lice mjesta gdje je prostor vlasništvo fizičkog lica i nije bilo uneseno u imovinu predlagača. Izjavio je da se iznos od 376,00 KM koji se pominje u bilansu stanja odnosi na stari printer i monitor koji se nalaze u podrumu i koji ne mogu pokriti ni minimum troškova stečajnog postupka, da je račun otvoren u UniCredit banci blokiran od 15.07.2021. godine, da društvo nema evidentirana stalna sredstva, zalihe, novac na blagajni niti bilo kakvu drugu imovinu, obaveze iskazane u bilansu stanja na dan 31.12.2022. godine iznose 96.807,00 KM i imaju tendenciju stalnog rasta, ne obavlja svoju registrovanu djelatnost duže od 3 godine niti ima mogućnosti da se poslovanje može nastaviti, a prijedlog za otvaranje stečajnog postupka pokrenut je u pisanom formi od strane zakonskog zastupnika, te kako imovina stečajnog dužnika ne postoji i nije dovoljna za pokriće troškova stečajnog postupka, smatra da su ispunjeni uslovi da stečajni sud otvori stečajni postupak koji se neće provoditi u skladu sa članom 102. stav 7. Zakona o stečaju. Izjavio je da prijedlog nije podnesen u zakonskom roku, jer je račun blokiran 15.07.2021. godine, a prijedlog je trebao biti podnesen u roku od 60 dana, dok je podnesen 29.05.2023. godine. Predložio je da sud pozove povjerioce i zainteresovana lica da predjumi troškove koji bi bili dovoljni u iznosu od 3.000,00 KM

Sud je donio odluku kao u izreci iz sljedećih razloga.

Odredbom člana 102. stav 6. Zakona o stečaju („Službene novine F BiH”, broj: 53/21) propisano je da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka, dok je stav 7. istog člana propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u „Službenim novinama Federacije BiH”, pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predjuma za obezbjeđenje troškova stečajnog postupka, u iznosu koji odredi stečajni sudija. Stavom 8. istog člana propisano je da ako u roku iz stava 7. ovog člana povjerioci i zainteresirana lica ne predlože otvaranje stečajnog postupka i ne uplate predjuma, stečajni sudija će otvoriti stečajni postupak i odmah zaključiti postupak.

Imajući u vidu prethodno navedeno, sud je primjenom odredbe člana 102. stav 7. Zakona o stečaju, rješenjem od 12.02.2024. godine pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predjuma za obezbjeđenje troškova stečajnog postupka u iznosu od 3.000,00 KM, te da po izvršenoj uplati predjuma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupku.

Rješenje ovog suda od 12.02.2024. godine objavljeno je na oglasnoj tabli suda 14.02.2024. godine, na web stranici suda 13.02.2024. godine i objavljeno je u „Službenim novinama Federacije BiH” broj: 15/24 od 23.02.2024. godine.

Kako stečajni dužnik ima obaveze, dok nema imovine ni za namirenje troškova stečajnog postupka, a povjerioci i zainteresovana lica po proteku roka ostavljenog u rješenju donesenom od strane ovog suda nisu predložili otvaranje stečajnog postupka niti predjumi novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečajnom postupku, odlučeno kao u izreci ovog rješenja.

Shodno odredbi člana 108. i člana 204. stav 5. Zakona o stečaju, ovim rješenjem određen je upis u registar poslovnih subjekata rješenja o otvaranju i zaključenju stečajnog postupka te naređeno brisanje stečajnog dužnika iz sudskog registra.

POUKA O PRAVNOM LIJEKU
Protiv ovog rješenja može se izjaviti žalba

Stečajni sudija

u roku od 8 dana od dana dostavljanja,
Kantonalmom sudu u Zenici putem ovog
suda u tri primjerka.

Samra Spahić-Drino